

## **Xitre Pawre kot Xitre hwÿr kagà nē mēnh**

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hō na pre. Nhūm pre Xitre Pawre hkôt pa hã mytwrÿ xohtō nē. Tã kêp Jejus kôt hkwÿjê nhō pastō kaxyw gō hipôk pê Kret ã arîk nē Tirtūm kapêr o mē ahkre ho mē hkôt pa. Jakamã nhūm Pawre kãm kagàja nhîpêx nē kamã kãm mēmoj tã karō. Tirtūm kapêr o mē hêx xwÿnhjaja tanhmã kot ja nē mē hkurê to hã kãm karō. Nē mē kot Tirtūm kapêr o mē ahkre mex pix xwÿnhjaja Jejus kwÿjê kaxyw kot mē rēnh ã kãm karō. Nē Jejus kwÿjaja kot axpēn to mex o pa hã kot mē kãm karō kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karō nē hã kagà nē hwÿr mēnh anē. Nē kãm:

<sup>1</sup> Pa Xitre? Xà amex? Ixpê Pawre na pa awÿr kagà nhîpêx nē kumê. Na pa hte Tirtūm mã tanhmã amnhî nhîpêx to ho ixpa. Nē ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nē mē kot hprî hã mar kaxyw Tirtūm kapêr o mē ahkre mex nē.

<sup>2</sup> Mē kot inhmar nē nhÿrmã htyk nē ma Tirtūm mē Jejus wa hwÿr àpir nē wa kuri htîr tūm nē pa ho pa hã amnhî kukamã hamaxpêr kaxyw. Am-nepêm na pre Tirtūm ã mē pahpê hkrajê hkukamã

mê pajarênh anê. Nê ãm hãmri ã mê pajarênh anê. Na hte mẽmoj tâ amnhĩ to hêx kêt nê.

<sup>3</sup> Tã ra mê pakukamã mê pamã mẽmoj to amnhĩrit nê inhmã kapêr o:

—E Pawre kêr ka ma mê hpiitã mê hkôt ri apa nê mê kãm ixkapêr jarê nê mê kãm: “Kot kaj mê amnhĩ kaxyw Tirtũm Kra hkôt ajamaxpêr nê hkôt amnhĩ xunhwỳ nhũm Tirtũm ja hã mê apumu nê mê ato hkra. Ka mê nhỹrmã atyk tâ nhũm amnhĩ wỳr mê ato api ka mê wa kuri amex kumrêx nê atĩr tũm nê apa ho apa.” Anhỹr o mê kãm ixkapêr jarênh o ri mê hkôt apa Pawre.

<sup>4</sup> Anhỹr o inhmã kapêr tâ pa ã amã ixkapêr nê hã kagã anê Xitre. Pajamê pahte amnhĩ kaxyw Jejus kôt pajamaxpêr nê hkôt amnhĩ xãm jakamã te apê ixkra pyrãk. Jakamã na pa hte ato Mẽpanhĩpêêxã maati Tirtũm mê mẽ papytãr xwỳnh Jejus Krisja wa hwỳr rãhã ho ri ixpa nê wa kãm:

—Pa Tirtũm mẽ Pahihti wa. Nà Xitre ho na pa wa awỳ. Kwa kêr ka wa kutã anojarêr rãhã ho ri apa. Kê wa akukwak ri hamakêtkati nê àmnhĩx pa ho pa. Anê.

*Kris kwỳ hkrãhtũmjaja kot tanhmã amnhĩ nhĩpêx to kaxyw mẽ hã kãm karõ*

*Wam Ximotre 3.1-13*

<sup>5</sup> Nê na pa pre Kret rũm inhnojarêr hãmri nê amã axapênh ã karõ nê Kret kãm are nê man mỗ. Na pa pre amã:

—E kêr ka jar arĩk nê mẽ kãm ixkapêr jarênh jatur xãm mênh o mẽ hkôt apa. Nê Kris kôt pahkwỳjê mã mẽ hkrãhtũmjê xunhwỳ. Kret kãm krĩ piitã hkôt. Na pa pre ixprĩ hã tanhmã amã mẽ harênh to. Tã kêr ka ate inhmar xà hkôt mẽ hkwỳjê kapi nê mẽ

unhwỳ. Koja mẽ ã amnhĩ nhĩpêx anhỹr o pa ka ja hã mẽ omu nẽ mẽ unhwỳ.

<sup>6</sup> Koja mẽ tãm amnhĩ nhĩpêx o pa nhũm mẽ piitã axpên mã mẽ mex ã mẽ harê.

Nẽ mẽ hprõ pix tânopxar o pa nẽ kuhpa hã nhãm mēnijê ho amnhĩkati hkêt nẽ.

Nẽ kê mẽ hkrajaja hipêêxà pyrà nẽ amnhĩ kaxyw Jejus kôt hamaxpêr o pa. Jao hipêêxà nẽ katorxà wa kapêr ma nẽ wa hkôt amnhĩ nhĩpêx. No ri htỳx ri amnhĩ tomnuj o pa hkêt nẽ.

Anhỹr o na pa pre mẽ hã amã karõ.

<sup>7</sup> Jejus kôt pahkwỳjê hkrãhtũmjaja kot Tĩrtũm nhỹ hã hkrajê mã kapêr mex o pa jakamã na htem tãm amnhĩ nhĩpêx o pa.

Nẽ amnhĩ pix kukamã hamaxpêr o pa hkêt nẽ.

Nẽ gryk tokyx anhỹr kêt nẽ.

Nẽ kagôxyhti japrôr nẽ ho pipãnh o pa hkêt nẽ.

Nẽ oprê ho pa hkêt nẽ.

Nẽ kàxpore rũnh prãm xàj hêx rom tanhmã amnhĩ nhĩpêx to hkêt nẽ.

Na htem ã amnhĩ nhĩpêx anhỹr hkêt nẽ.

<sup>8</sup> ãm àmnhĩx amnhĩ nhõrkwỹ hwỳr mẽ hwỳr o pa.

Nẽ mẽ piitã mẽ kutã nojarêt rãhã nẽ.

Nẽ tãm hamaxpêr nẽ tãm mẽ piitã mẽ hipêx o pa.

Nẽ amnhĩ tomnuj pymaj amnhĩ to htỳx pê Tĩrtũm kôt amnhĩ nhĩpêx mex rãhã ho pa.

<sup>9</sup> Nẽ mẽ kot Tĩrtũm kapêr mar tỳx jakamã kê mẽ arĩ hã nohtỳx nẽ mar tỳx xà hkôt amnhĩ xô ri ho hkwỳjê jahkre mex o pa.

Nẽ ho mẽ piitã mẽ hamaxpêr o hihtỳx o pa.

Nhũm mẽhõ Tĩrtũm kapêr kwỳm ri tanhmã ujarênh to nhũm hã kuma nẽ hprĩ hã kãm

tanhmã harēnh to kê mar mex nē.  
 E Xitre. Na hte ã Jejus kwỳjê hkrãhtũmjaja amnhĩ  
 nhĩpêx anhỹr o pa. Jakamã kêr ka aprĩ hã Kret kãm  
 Jejus kôt pahkwỳjê kapi nē mẽ kot tanhmã amnhĩ  
 nhĩpêx to ho pa hã mẽ omu. Nhũm mēhõ ã amnhĩ  
 nhĩpêx anē ka ja hã omu hãmri nē kêp Jejus kwỳjê  
 hkrãhtũm kaxyw ãm.

*Kret nhõ xwỳnhjaja kot tanhmã amnhĩ tomnuj to  
 hã mẽ harēnh*

*Xitre 3.9-11*

<sup>10</sup> Nē atar Kret kãm na hte mẽ ohtô nē kãm mẽ  
 õ pahi kapêr mar prãm kêt nē htỳx ri tanhmã Kris  
 kwỳjê mã kapêr to ho pa. Na hte Ijaew kwỳjaja ã  
 amnhĩ nhĩpêx anhỹr o pa. Jao Ijaew kêt xwỳnh kot  
 Jejus kôt amnhĩ xunhwỳr xwỳnhjê mã kãm:

—Kwa mẽ ixpyrà nē mẽ ixpê Ijaewjê kot amnhĩ  
 nhĩpêx kôt mãn amnhĩ nhĩpêx kêt wehe.

<sup>11</sup> Anhỹr o mẽ kãm kapêr jakamã kwa kêr ka ã  
 mẽ kapêr anhỹrja nē mẽ kãm akapêr kãm axihtỳx  
 nē. Na htem hpijaàm kêt o hikàxpore hprãm xàj ã  
 mẽ kãm kapêr anhỹr o pa. Jao mẽ hamaxpêr o ahkà  
 nhũm mẽ kuma nē tee ri hamaxpêr.

<sup>12</sup> Na pre ra mẽ hkwỳjê hõ tanhmã mẽ harēnh to.  
 Mẽ ahkre xwỳnhjê hõja mẽ harēnh o:

—Kret nhõ xwỳnhjaja na htem hêx pix o pa.  
 Nē oprê nē kãm kaga nē apkur xà pix kukamã  
 hamaxpêr o pa. Anē.

<sup>13</sup> ãm hãmri ã mẽ harēnh kot anhỹr. ã mẽ kot  
 amnhĩ nhĩpêx anhỹr jakamã kwa mẽ kot amnhĩ  
 nhĩpêxja nē mẽ kãm akapêr kãm axihtỳx o ri mẽ  
 hkôt apa Xitre. Kê mẽ ã amnhĩ nhĩpêx anhỹr kêt  
 nē. Nē mẽ kãm anē kê mẽ amnhĩ kaxyw Tĩrtũm kôt  
 mãn hamaxpêr tỳx nē.

14 Nē kē mẽ axte Ijaewjê xujarēnh nē mẽ kot amnhĩ nhĩpêx kôt amnhĩ nhĩpêx kêt nē. Ā mẽ kot amnhĩ nhĩpêx o pa hã mẽ kãm karō xwýnhjaja na prem Tĩrtũm kapêr kaga hpa.

15 Mẽ kot Jejus kôt amnhĩ xunhwýr xwýnhjaja tãm mẽ hamaxpêr o pa jakamã na htem Tĩrtũm kot mẽmoj piitã ho kator xwýnh pumu nē piitã mex ã harê. No mẽ kêp Jejus kwý hkêt xwýnhjaja na htem hamaxpêr punuj pix o pa. Nē mẽmoj mex pumu nē mex kêt ã harê. Mex tã nhũm mex kêt ã harēnh o pa.

16 Nē mẽ kêp Tĩrtũm kra hã amnhĩ jarēnh tã amnhĩ tomnuj pix o pa. Jao kêp hkra hã amnhĩ jarēnh o hêx nē kapêr kwým ri amnhĩ nhĩpêx pix o pa. Nhũm Tĩrtũm tee ri ja hã mẽ omu nē kãm mẽ hkĩnh kêt nē. Tĩrtũm mã mẽ kot amnhĩ to mex kwý mẽ hã jêt kêt kumrêx.

## 2

<sup>1</sup> E Xitre kot paj tanhmã ate mẽ ahkre hto hã amã karō ka inhma nē amnhĩ xô ri mẽ kãm hã karō ho ri apa.

*Měmy wejjaja kot tanhmã amnhĩ nhĩpêx to kaxyw mẽ hã kãm karō*

<sup>2</sup> Nē kêr ka mẽmy wejjê mã anê kē mẽ amnhĩ to àptàr mex nē pa.

Nē pipãnh nē ri pa hkêt nē.

Nē mẽ gryk kaxyw htýx ri hkwyjê hã hpêr o pikēnh kêt nē.

Kē mẽ tãm hamaxpêr nē tãm amnhĩ nhĩpêx o pa. Nē amnhĩ kaxyw Jejus kôt hamaxpêr týt rãhã nē.

Nhũm mẽ hkwyjaja kot mẽmoj tã tanhmã mẽ  
 homnuj to htã kê mẽ arĩ tãm amnhĩ nhĩpêx o  
 pa nẽ amnhĩ tã tanhmã mẽ ho hkêt nẽ.  
 E kër ka ã mẽmy wejjê mã ja hã akarõ anẽ.

*Mëni wejjaja kot tanhmã amnhĩ nhĩpêx to kaxyw  
 mẽ hã kãm karõ*  
*Wam Korõt 14.34-35; Wam Ximotre 2.9-15, 3.11;*  
*Wam Pêtre 3.1-6*

<sup>3-4</sup> Nẽ mẽni wejjê mã anẽ kê mẽ kãm Jejus kĩnh  
 xàj tãm ri amnhĩ nhĩpêx o pa.

Jao xypên jakwa kamã nhãm mẽ hixi ho rêr o pa  
 hkêt nẽ.

Nẽ kagôxyhti ho pipãnh o pa hkêt nẽ.

Nẽ mẽ kãm anẽ kê mẽni xàptàr nywjê jahkre mex  
 o pa. Mẽ kot mẽ mar nẽ mẽ uràk nẽ tãm amnhĩ  
 nhĩpêx kaxyw. Jao mẽ kãm mẽ mjên nẽ mẽ  
 hkrajê japê hã mẽ kãm mẽmoj to anhỹr o mẽ  
 kutã nojarêt rãhã ho pa.

Kër ka ã mẽni wejjê mã akapêr anẽ.

*Mëni xàptàr nywjaja kot tanhmã amnhĩ nhĩpêx to  
 kaxyw mẽ hã kãm karõ*

<sup>5</sup> Nẽ mẽni xàptàr nywjê mã anẽ kê mẽ tãm  
 hamaxpêr pê tãm amnhĩ nhĩpêx o pa.

Nẽ mẽ òrkwỹ kamã àpênh mex o pa.

Nẽ mẽ mjên kapêr ma nẽ hkôt amnhĩ nhĩpêx.

E. ã mẽni xàptàr nywjê mã karõ anẽ. Koja mẽ ã  
 amnhĩ nhĩpêx anhỹr o pa hãmri nhũm mẽ piitã mẽ  
 kot amnhĩ nhĩpêx ã mẽ omu nẽ mẽ harênh o:

–Tĩrtũm kapêrja mex kumrêx. Mẽ kot hkôt  
 amnhĩ nhĩpêx o mẽ pa xwỳnhjaja na htem tãm  
 amnhĩ nhĩpêx mex o pa. Anẽ.

*Měmy xàptàr nywjaja kot tanhmã amnhĩ nhĩpêx to kaxyw mẽ hã kãm karõ*

*Wam Ximotre 4.12; Sikũn Ximotre 2.22; Wam Pêtre 5.5*

<sup>6</sup> Nê kêr ka mẽmy xàptàr nywjê mã anê kê mẽ mẽmoj punuj pê amnhĩ to htỳx o pa. Mẽ hamaxpêr punuj nê mẽ kot tanhmã amnhĩ tomnuj to pê amnhĩ to htỳx o pa.

<sup>7</sup> Nê kêr ka ajaxwỳja tãm amnhĩ nhĩpêx rãhã ho ri mẽ hkôt apa Xitre. Mẽ kot ja hã apumunh nê akôt amnhĩ nhĩpêx o pa kaxyw. Nom kêr ka tanhmã mẽ ahkre hto hkwỳm ri tanhmã amnhĩ nhĩpêx to hkêt nê. ãm Tĩrtũm ã apijaàm o akatàt kôt mẽ kãm kapêr o mẽ ahkre pê tãm amnhĩ nhĩpêx o ri apa.

<sup>8</sup> Nê kêr ka tãm akapêr rãhã ho ri apa. Kêr kê mẽ kãm mẽ pahkurê xwỳnhjaja ja hã ama nê amnhĩ kamã hpijaàm hãmri nê apê Kris kwỳ hã tanhmã ato kapêr punuj to hkêt japêr.

*Mẽ kãm mẽ àpênh xwỳnhjaja kot tanhmã amnhĩ nhĩpêx to kaxyw mẽ hã kãm karõ*

*Epes 6.5-8; Korosẽ 3.22-25; Wam Ximotre 6.1-2; Wam Pêtre 2.18-25*

<sup>9</sup> Nê kêr ka mẽ kãm mẽ àpênh o mẽ pa xwỳnhjê mã anê kê mẽ õ patrãw kãm hprãm xà hkôt amnhĩ nhĩpêx o pa.

Jao mẽ kapêr ma nê hkôt amnhĩ nhĩpêx mex nê. Nê amnhĩ tã tanhmã mẽ kãm kapêr punuj to hkêt nê.

<sup>10</sup> Nê kê mẽ kêp mẽmoj to àhkĩnh kêt nê.

Nê tãm mẽ hipêx rãhã nê.

Nê kãm hkukrêx jamãr mex o pa.

Koja mẽ ã amnhĩ nhĩpêx anhÿr o pa nhũm mẽ õ patrãw amnhĩ tã mẽ omu mẽ mẽ ÿ hã hkĩnh mẽ pa. Hãmri mẽ hamaxpêr o:

—Hêxta waa mẽ. Inhmã àpênh xwÿnhhta na hte inhmã àpênh mex o pa. Na hte ixkukrêx mẽ ixkrit jamãr mex mẽ ixpê mẽmoj to àhkĩnh kêt mẽ. Nà mẽ kot Tĩrtũm kapêr kôt amnhĩ nhĩpêx o mẽ pa xwÿnhjaja na htem tãm amnhĩ nhĩpêx o pa. Pêr Tĩrtũm kapêr ãm hãmri na. ãm mex o mex. Anê.

E Xitre kêr ka mẽ kãm mẽ àpênh xwÿnhjê mã ã mẽ kot amnhĩ nhĩpêx anhÿr ã karõ.

*Tanhmã Jejus kãm mẽ pajapê xàj amnhĩ nhĩpêx to hã harênh*

*Epes 2.8-10; Wam Tesarõn 1.9-10*

<sup>11</sup> Nê Tĩrtũm kot mẽmoj to mẽ pakutã nojarêr rãhã ho pa jakamã na hte mẽ pahte Kra hkôt amnhĩ xunhwÿr xwÿnhjê ho hkra pu mẽ nhÿrmã wa kuri pahĩr tũm mẽ papa ho papa.

<sup>12</sup> Na hte ã mẽ pamã kapêr o amnhĩrĩt anê mẽ mẽ pamã:

—E kêr ka mẽ apê ixkra hã tãm amnhĩ nhĩpêx rãhã ho ri apa mẽ axte tanhmã amnhĩ tomnuj to nê tanhmã ajamaxpêr punuj to hkêt mẽ. Mẽ ate amnhĩ tomnuj pê amnhĩ to htÿx mẽ ixkapêr kôt pix mã ri amnhĩ nhĩpêx rãhã mẽ. Anê.

<sup>13</sup> Na pu htem ã amnhĩ nhĩpêx anhÿr o papa jao pahkĩnh mẽ mẽ papytãr xwÿnh Jejus Kris jamãr o papa. Koja nhÿrmã mẽ panhõ Tĩrtũm xihtÿx xwÿnhja akupÿn mẽ pahwÿr kumẽ pu mẽ mex o mex ã omu.

<sup>14</sup> Na pre Jejus amnhĩ grõnh kôt mẽ pahwÿr wrÿ mẽ mẽ pahpiitã mẽ pahte amnhĩ tomnuj pãnhã



amnhĩrer kaxyw htyk o Tĩrtũm mã amnhĩrer pa. Mẽmo kaxyw na pre ã mẽ panê amnhĩ nhĩpêx anê? Nà mẽ pahpê hkwỳja na kãm hprãm. Nẽ mẽ pahte tãm ri Tĩrtũm kapêr kôt amnhĩ nhĩpêx o papaja na kãm hprãm. Nẽ mẽ pahte uràk nẽ mẽ piitã mẽ kutã panojarêt rãhã ho papaja na kãm hprãm. Jakamã na pre ã mẽ panê amnhĩ nhĩpêx anê.

<sup>15</sup> E Xitre. Ixte mẽmoj tã amã karõja kêr ka ho Kris kwỳjê jahkre mex o apa kê mẽ ama nẽ kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu nẽ Tĩrtũm nhỹ hã tanhmã nê kãm akapêr to kê axte hkêt nẽ. Tã mãn ka inhma. Kêr ka ã Kris kwỳjê jahkre mex o apa anê.

### 3

*Tanhmã Kris kwỳ kot amnhĩ nhĩpêx to hã mẽ kãm karõ*

*Rõmãn 13.1-10; Epes 2.1-10*

<sup>1</sup> Nẽ kêr ka Kris kôt akwỳjê mã anê kê mẽ ho amnhĩptàr xwỳnhjê kapêr ma nẽ mẽ hkôt amnhĩ nhĩpêx o pa. Nẽ mẽmoj to mẽ kutã nojarêt rãhã ho pa.

<sup>2</sup> Nẽ mẽ kãm anê kê mẽ tanhmã hkwỳjê mã kapêr punuj to ho pa hkêt nẽ. Rỳ mẽmoj tã mẽ kãm àkjêr kêt nẽ. Kê mẽ tãm mẽ hipêx nẽ mẽ kamã ukapri pẽ mẽ ho mex rãhã ho pa. Na hte ã Kris kwỳjaja axpẽn nhĩpêx o pa anê.

<sup>3</sup> Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỹr kêt nẽ. Na pu prem Tĩrtũm mã pajamaxpêr kêt nẽ kapêr kôt ri amnhĩ nhĩpêx hkêt nẽ. Nẽ amnhĩ tomnuj pix kukamã pajamaxpêr o ri papa. Nẽ amnhĩ pix

kukamã pajamaxpër. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nẽ axpẽn tomnuj mẽ. Nẽ axpẽn kãm pagryk rãhã ho papa. Á mẽ pahte amnhĩ nhĩpêx anhỹr ho papa jakamã nhũm pre mẽ piitã kãm mẽ pahkĩnh kêt mẽ. Pu mẽ pajaxwỳja pamã mẽ hkĩnh kêt mẽ.

*Tanhmã Tĩrtũm kot mẽ pahto mex to hã harẽnh Rômãn 5.6-8; Epes 2.4-10*

<sup>4</sup> Tã pu prem Tĩrtũm kệp mẽ papytãr xwỳnh ã harẽnh ma. Kot tanhmã mẽ panê amnhĩ nhĩpêx to hã harẽnh ma mẽ mex o mex mẽ mẽ pakamã ukaprĩ hã harẽnh ma.

<sup>5-6</sup> Hãmri mẽ amnhĩ kaxyw hkôt pajamaxpër mẽ hkôt amnhĩ xunhwỳ nhũm amnhĩ tã mẽ pahpumu mẽ mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt mẽ. Mẽ pahte tanhmã amnhĩ to mex tore hã. Na pre mẽ pakamã ukaprĩ mẽ ã mẽ papytãr anê. Tã tanhmã na pre mẽ papytãr to wehe? Nà na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri mẽ mẽ pahwỳr amnhĩ Karõ rẽ nhũm mẽ pahwỳr agjê mẽ mẽ pamã mẽ pahte amnhĩ nhĩpêx nyw gõ. Á na pre Tĩrtũm Jejus Kris kot mẽ panê htyk kukwak ri mẽ pahto mex rax anê hãmri mẽ mẽ pahwỳr amnhĩ Karõ rẽnh anê.

<sup>7</sup> Tã mẽmo kaxyw na pre ã mẽ pahto mex anê? Nà kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwỳnh tã kãm mẽ pajapê htyx mẽ kãm tanhmã mẽ pahto hprãm kêt mẽ. Nẽ mẽ pahwỳr Kra Jejus mẽ nhũm wrỳ mẽ mẽ

pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpêr nê hkôt amnhĩ xunhwÿr xwÿnhjaja Jejus kukwak ri mẽ pahpê Tĩrtũm kraa. Ā na pre Jejus mẽ pahto mex anê. Jakamã kot puj mẽ nhÿrmã Tĩrtũm mẽ wa kuri pahtĩr tũm nê pamex nê papa ho papa. Koja wa nhÿrmã Ā mẽ pahto mex anê.

<sup>8</sup> Ām hãmri na pa amã Ā ja jarēnh anê Xitre. Jakamã kwa kêr ka inhma nê inhmar tÿx nê. Nê ho amnhĩ kaxyw Tĩrtũm kôt mẽ hamaxpêr xwÿnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

<sup>9</sup> Nê mẽ kot htÿx ri mẽmoj tã axpēn mã àkjêr o mẽ pa xwÿnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rÿ finat Mojes kot Tĩrtũm nhÿ hã kapêr Ā axpēn mã mẽ àkjêr xwÿnhjê hkôt apa hkêt nê. Na htem Ā ri axpēn mã àkjêr anhÿr o pa nê tãm amnhĩ nhĩpêx kêt nê.

<sup>10</sup> Nê koja mẽ akwÿjê hõ amnhĩ krã hkôt tanhmã hkwyjê mã kapêr to nhũm mẽ kuma nê hã axpēn mã akir nê axpēn pê pikjêr kaxyw. Ka ja hã omu nê Ā kapêr anhÿrja nê kãm akapêr kê axte hkêt nê. Hãmri nhũm ama nê Ām ama nê arĩ Ā mẽ kãm kapêr anhÿr japêr ka axte nê kãm akapêr. Tã ra ate nê kãm akapêr o axkrut tã nhũm arĩ Ā kapêr anhÿr o axkrunēpxi japêr ka ja hã omu hãmri nê mẽ amnhĩ nê hano kê axte mẽ apê Kris kwÿjê hkôt ri pa hkêt nê.

<sup>11</sup> Ā mẽ kot amnhĩ nhĩpêx anhÿr o mẽ pa xwÿnhjaja na mẽ ra Jejus wÿr pry kaga nê htÿx ri tanhmã amnhĩ tomnuj to ho pa. Nê Ā amnhĩ nhĩpêx anhÿr o pa jao kêp Kris kwÿ hkêt Ā amnhĩ

to amnhĩrĩt.

*Pawre kot kagà jatur xà kamã tanhmã Xitre mã kapẽr to*

<sup>12</sup> Nẽ kot paj tokyx ma Nĩkop wỳr mỗ. Kêr pa tokyx hwỳr pỏj nẽ amgrà pê krĩ nhỗ xwỳnhjê hkỏt ixpa. Jakamã kot paj tokyx ma awỳr Atẽmti rỳ Xikitre mẽ. Kê mỗ nẽ awỳr pỏj ka tokyx tanhmã amnhĩ to hpa nẽ man ixwỳr mỗ pu mẽ Nĩkop kamã axpẽn pumu.

<sup>13</sup> Nẽ ota mẽ akuri Apor mẽ axiwỏkat Jẽntija. Koja wa mẽmo arĩgro hã ma krĩ hỏ hwỳr nojarêt ka wa kãm mẽ apkur xà hkwy gỏ kê wa ma ỳ kamã mỏr kêt nẽ.

<sup>14</sup> Nẽ kêr ka Kris kwỳjê mã anẽ kê mẽ arĩ ỏrkwỳ pix kãm hkrĩ ho hkrĩ hkêt nẽ. Kê mẽ tanhmã axpẽn to mex to ho axpẽn kỏt pa. Nhũm mẽhỏ kêp amrakati kê mẽ tanhmã ho ajuta hto. Mẽ kãm anẽ kê mẽ ả axpẽn nhĩpêx anhỹr o pa.

<sup>15</sup> Nẽ ota jar Kris kỏt pahkwỳjê piitã awỳr hpêr mẽ Xitre. Nẽ kêr ka atar Kris kỏt mẽ pahkràmnhwỳjê mã mẽ ijarẽ.

E ảm ja pix. Kê Pahihtĩ Jejus mẽ akutã nojarêt rãhã ho pa. Ixpê Pawre na pa amã ả ixkapêr nẽ hã kagà nẽ awỳr mẽnh anẽ.

**Tĩrtũm kapēr ã kagà nyw**  
**New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

**Copyright Information**

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apinayé

**© 1999, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 18 Apr 2025 from source files  
dated 29 Jan 2022

383a4e22-34cd-505f-9cc2-2f9921e7aa9f